

陶文毅公全集

陶文毅公全集卷五目錄

奏疏

選政  
吏治

請禁吏部重籤名目摺子

陳奏州縣積弊摺子

酌改題調知縣并佐雜簡要各缺摺子

江蘇裁汰文職閒員摺子

安徽裁汰閒員摺子

金山縣知縣典史移駐洙涇鎮其原駐洙涇之巡

檢卽移駐衛城摺子

海州州判衙署移建響水口摺子

奏疏

選政

吏治

請禁吏部重籤名目摺子

奏爲縷陳吏部重籤之弊請

旨查明嚴禁以肅選政事

臣

惟立法期於畫一法不一

則弊竇叢生吏部總司選政近年來檢舉之案不一而足而且爭缺之案有之配籤作弊之案有之然或意見偶岐或防範不及未有明目張膽別立一法以待弊混之來如重籤之甚者也其法於掣籤既定之後將續到應附在後之員重爲設籤令其補掣如掣得第一名則插入初掣第一名之後

謂之重一籤掣得第二名則插入初掣第二名之後謂之重二籤以有定之籤復作爲無定之法巧爲鑽入不公孰甚吏部向無此例聞自嘉慶十年捐納道員呂昌會始爲開端現在投供候選人員內卽有補掣重籤之張毓秀一員查張毓秀係嘉慶九年舉人十三年議敘縣丞十四年始改歸知縣補掣重籤第二名插入十三年議敘知縣第二名之後此外補掣重籤如張毓秀者恐復不少非澈底查明無以公選法而杜弊端伏思部務一切以例爲主今重籤非例所有舍例言案其弊一也

呂昌會以捐班而掣重籤張毓秀以議敘比照而掣重籤既無專條又無限制人人可以比照卽人不可以比照可以比照既開濫倖之門不可以比照勢必起賄託營求之漸其弊二也掣籤之員每班或數人或數十人多者或數百人一經掣定人心帖然今既補掣名雖重一其實初掣第二名以後盡爲所壓名雖重二其實初掣第三名以後盡爲所壓後來居上於理未平且聞呂昌會亦係掣得重三名次與張毓秀之掣重二相似以滿筒之籤並不掣向稍後形跡疑似之間易滋物議其

弊三也掣籤以文書到齊爲憑例應奏定限期踰限不到卽無庸查辦其行查及續到人員祇准附於初掣人員之末原以昭畫一而防怠玩今以上年之案遲至次年始到復插入上年籤掣前三名之內是吏部奏定限期全不爲憑而踰限不到者轉得補掣在前易啟趨避取巧之端其弊四也重籤之掣或以遺漏爲名或以錯誤爲名不知遺漏錯誤在吏部則應自行檢舉在別部則應處分別部在本員則爲自行貽誤更應附在末後方昭平允何得設此活法預爲遺漏錯誤地步其弊五也

現開豫東事例報捐人員難保無冊結遲延及遺漏錯誤之事若似此紛紛比照書吏人等得以上下其手勢必藉端訛索又釀事案不可不早爲滌除應請

敕下該部查明從前掣重籤者共有幾員詳悉開列事由應否更正伏候

聖裁其重籤名目請嗣後概行禁止倘有本員自行遺漏錯誤者祇准附於初掣人員之末若遺漏錯誤與本員無干卽一面將遺漏錯誤之官吏參處一面專摺具奏請

旨定奪不得牽引成案率行比照庶法歸一定而吏胥  
不能爲奸矣臣爲防弊起見是否有當伏祈

皇上睿鑒謹

奏

嘉慶十九年十月十九日奉

硃批所奏甚是吏部堂官各矢天良明白回奏欽此



陳奏州縣積弊摺子

奏爲州縣之錮弊日深州縣之疲頑有自請治其源  
以端吏治事伏見我

皇上兢兢業業無刻不以吏治民生爲念而尤以因循  
怠玩揭中外臣工之積弊凡有人心自應洗滌肺  
腸仰承

聖誨乃近日風氣因循者尙復因循怠玩者依然怠玩  
卽如虧空之案甫經查辦而新款又有虧空科派  
之案屢經懲創而外省猶多科派此固由州縣官  
之昧良而亦其源未治也夫所謂其源者何督撫

藩臬各上司是也上司不能正己率屬則不肖之  
州縣既有所挾持以無恐而循良之州縣又有所  
牽掣而不能前弊端不一

臣請摘其尤甚者爲

皇上陳之

一勒接交代也一官纔蒞豈能卽般庫項無如前  
任虧空已多上司懼干失察之咎必欲新官接  
受少者數千多者數萬桃僵李代不接不能到  
任其有稟揭前任虧空者則必致上司之隱怒  
或以才力不及而調簡或以辦事迂拘而改教  
甚至別假事端劾而去之是以甫登仕籍卽入

債鄉始基不立而望以清廉難矣

一多攤捐款也州縣廉俸有數乃無端藉公科派其名曰籌補曰幫助曰貼賠曰使費總名曰捐款因其出之自公故不甚愛惜每由首府首縣墊出然後攤派各州縣每歲數百數千兩不等各州縣力不能應有時延緩則上司卽於其徵解錢糧時准作某項捐款而錢糧則批令另解是以

國家惟正之供抵私款也虧空之積由此深矣

一預備賞號也凡上司有事或練兵或巡邊或公

讌則州縣預備賞封及綴正銀牌之類上司隨手揮霍無非慷他人之慨然當場進賞猶可言也有等上司竟將賞項先收入已臨時自行發出於是家人吏役節節又添規費出數少而入數多而賞號之名適足爲巧取之目矣

一派辦供給也凡上司入境出境送往迎來則有夫馬有酒席有站規有門包其同城居住者則有輪月之供給有包月之供給甚至一窗一扉一廚一廁皆於附郭之州縣是問復派他處之州縣協濟焉此等供給名目近來頗知斂戢然

尙未能盡革也

一壓薦幕友也州縣事務較繁刑名錢穀原不能不借助爲理乃一官尙未到任而幕友之舉薦已多其賢否無從辨也但擇其情面較大者而受焉道府所薦者旣受則藩臬所薦者不能不受督撫所薦者更不敢不受且有並未見面但送束脩者謂之食坐俸此所以人愈多費愈繁而事愈勞也

一濫送長隨也長隨不必皆上司舊人或資緣上司之親串或鈎結上司之門丁邀求吹薦在上

司不過泛然一語而州縣則以上司所薦而不敢辭長隨又以薦自上司而罔所忌未離省會早已百十成羣及至抵任人浮於事既難人人飽慾必至事事生端或外勾吏役或內通劣幕百弊自此叢生矣

一委員需索也州縣固多無良委員豈皆可靠假以耳目易致需索乃一紙文書可辦之事動輒派委數員在上司不過爲調劑閒官起見不知一來一往盤費不貲在委員所得無幾而州縣之累已深甚至因饋送不遂而簸弄是非則掣

肘之事更多矣

一提省羈留也州縣各有職守不容曠廢即使因公晉省亦當飭令速歸乃或因細故而提省羈候轉委他人前往署事迨一年半載之後始令回任以致無累者生累有累者增累不思州縣果不勝任卽應參劾徒令往返奔波是重其倣也安能不虧空乎

以上數條督撫藩臬中雖賢者或亦不免至於作福作威不公不法橫索屬員者則又不待言矣夫今之州縣疲精於奔走承應之中救過於紙札文

書之上十人而聚無語田桑者焉百人而聚無語  
教化者焉其於百姓則魚肉也百姓視之亦幾虎  
狼也抑思果何由而致是哉各省大吏受

恩深重若不正本清源以身率屬而徒以不肖之州縣  
爲解恐吏治終無起色也

臣仰覩

聖人宵旰焦勞未敢緘默謹據實縷陳伏祈

睿鑒訓示謹

奏

嘉慶十九年十二月初七日奉

上諭御史陶澍奏外省州縣積習請治其源以端吏治



一摺各州縣爲親民之官惟在牧養有方教化有法  
斯吏治端而民生日裕乃因循疲玩相習成風若不  
亟加整頓何以革敝習而勵官方如該御史所稱州  
縣交代虧空上司懼干失察之咎勒令新任接收又  
藉公科派有籌補幫貼使費等款及預備賞號派辦  
供給壓薦幕友濫送長隨並委員需索提省羈留種  
種苦累皆各省實在情形總緣外省大吏不以吏治  
爲事其始稍開其端久之揚波逐流日甚一日陋習  
相沿遂至成爲錮弊雖有一二自好之士亦不能卓  
然自拔今欲清其源責在大吏著通諭直省督撫藩

臬等務各洗心滌慮飭紀整綱伊等養廉優厚一切  
賞需供頓不可絲毫累及屬員其州縣因攤捐羈候  
橫被苦累之處查明悉予裁革俾賢能者得以自立  
中材以下亦無所藉口庶幾大法小廉吏治日有起  
色以厚民生以興民行胥於此端其本焉欽此

酌改題調知縣并佐雜簡要各缺摺子

奏爲酌改題調知縣并佐雜簡要各缺以歸核實而重地方仰祈

聖鑒事竊照知縣繁要各缺例應分別題調俾治理得人各適其宜向例應調知縣出缺於現任人員內揀選調補不准以應陞人員題陞其並無題缺省分及題缺僅止二三者亦准以應陞人員題請陞用其有應題出缺只准以應陞人員題陞概不准以初仕試用人員請補誠以治理必資練達之才而揀用尤貴人地相宜也現在定例應調出缺必

於現任人員內揀調如現任實無堪調之員准以  
候補人員內揀補不准以佐貳請陞應題出缺先  
儘候補正途題補如正途無人方准以佐雜題陞  
其候補一項無論何項出身凡有應歸候補者俱  
爲正途等語是遇有題調出缺自應於現任及候  
補人員內分別揀調題補惟是地方情形不一人  
材優絀不齊必須因才任使方克收治理之效免  
致貽誤地方是以

國家定制如人地實在相須卽與例稍有未符准督  
撫專摺

奏請於限制之中仍寓變通之道立法實爲盡善茲  
查安徽省懷寧縣知縣係衝繁難兼三要缺於乾隆  
十三年議定在外揀選題補查該縣地當省會  
水陸交衝爲通省州縣領袖時有發審案件且附  
郭僅止一縣較之尋常要缺政務尤爲殷繁非精  
明歷練賢能兼擅之員不足以資治理必須於通  
省現任人員內揀選調補檢查嘉慶元年以後歷  
次出缺均以現任人員

奏請調補並無以應陞人員題陞之案是該縣之爲  
題缺係屬有名無實又靈璧縣知縣係沿河兼三

要缺本係在外揀選題補嗣於嘉慶十九年奉部  
定爲調缺查皖省沿河沿湖知縣除靈璧盱眙要  
缺外並無沿河中簡之缺無可揀調各屬現任人  
員堪膺繁劇而又兼諳河工者實難其人臣等酌  
核地方情形往返札商應請將懷甯縣知縣改爲  
調缺於對品現任人員內揀選請調靈璧縣知縣  
改爲題缺先儘候補知縣人員擇其才堪繁劇兼  
諳河務者題請補用如候補知縣內實無人地相  
宜之員似應量爲變通於曾經保薦應陞人員內  
揀選賢能題請陞補仍遵人地相須之例於疏內

分晰聲明恭候

聖裁如此則題調名實相符而因才任使不拘一途亦足收治理得人之益再懷寧縣典史一缺本係選缺惟地處省會其所管監獄不止本邑罪囚凡各屬解省審轉并提省發審案犯均須分發監禁人數衆多迥非外縣囹圄可比一切稽查防範尤關緊要實非初任人員所能勝任應請改爲要缺於現任對品人員內揀選調補惟選缺改調應以調缺改抵安省典史並無調缺惟有舒城縣曉天鎮巡檢向係調缺該處地非衝要並無餉鞘及遞解

人犯事件居民亦不甚多易於稽查彈壓應請改  
爲選缺一轉移間各得其宜洵於公務有裨據藩  
臬兩司會詳前來臣等因慎重地方起見謹會同  
河臣張文浩合詞恭摺具  
奏伏乞

皇上聖鑒訓示

敕部議覆施行謹

奏

道光四年十一月二十一日奉到

硃批吏部議奏欽此



江蘇裁汰文職閒員摺子

奏爲遵

旨酌裁文職閒員據實覆

奏仰祈

聖鑒事竊准吏部咨開欽奉

上諭各直省督撫於所轄文職閒員如有可裁者酌量  
裁汰據實奏聞請旨用副朕慎簡官僚勤恤民隱至  
意等因欽此伏查江蘇省地方遼濶賦重政繁邇來  
生齒日多民事增劇原設道府丞倅州縣正印各  
官分任地方事宜凡徵收錢糧及審辦命盜等案

在在均關緊要各有專司實無閒冗可裁之缺教職雖僅司訓課而江蘇學額較廣啟迪是資亦難裁汰惟於佐雜各缺中逐加酌核查得華亭縣主簿一缺僅管水利如遇挑河等事仍應移縣詳辦此外並無巡防分汛專責堪以裁汰該主簿所司水利事務應就近改歸該縣縣丞兼管又鎮江府照磨一缺祇有稽查渡江救生船隻別無專管事務亦屬可裁其所司稽查救生船事宜改歸鎮江府知事兼管又金壇縣湖溪司巡檢一缺該處居民甚少並無衙門巡檢在縣城賃房居住殊無分

防之實又江寧府照磨一缺除差委外並無專管  
事宜又揚州府檢校一缺祇有稽查刑溝閘座督  
夫啟閉事宜可以改歸揚州府經歷就近兼管此  
外別無專司之事以上三缺亦可一併裁汰所有  
各缺額設辦事書役汰令歸農一切文卷概行移  
交改歸衙門管理所遺衙署及應繳

敕書印信等件俟奉准之日照例查辦至此外佐雜各  
缺今昔繁簡時有不同仍當體察情形隨時酌量  
辦理再現任華亭縣主簿黃榜業經請陞婁縣縣  
丞所遺華亭縣主簿無庸再行揀員請補其現任

鎮江府照磨余錫溥金壇縣胡溪司巡檢陳皓江  
寧府照磨章春奎署揚州府檢校林鳳喈均請照  
例撤回留省遇缺卽補據江蘇藩臬各司會詳前  
來

聞請

臣

往返札商意見相同理合據實奏

旨俯准將華亭縣主簿鎮江府照磨金壇縣湖溪司巡  
檢江寧府照磨揚州府檢校五缺裁汰以副

聖主愼簡官僚循名核實至意所有酌裁閒員緣由謹  
合詞恭摺具

奏伏乞

皇上聖鑒訓示謹

奏

道光十二年八月二十日奉到

硃批另有旨欽此同日奉到道光十二年八月初五日

內閣奉

上諭陶澍等奏酌裁文職閒員一摺江蘇華亭縣主簿一缺無巡防分汛專責著卽裁汰該主簿所司水利事務著改歸該縣縣丞兼管鎮江府照磨一缺無專管事務著卽裁汰其所司稽查渡江救生船事宜著改歸鎮江府知事兼管金壇縣湖溪司巡檢無分防

之實江寧府照磨一缺無專管事宜揚州府檢校一缺無專司之事所有稽查刑溝閘座督夫啟閉事宜著改歸揚州府經歷兼管以上三缺俱著一併裁汰其鎮江府照磨余錫溥金壇縣湖溪司巡檢陳皓江寧府照磨章春奎署揚州府檢校林鳳階均著撤回留於該省遇缺卽補該部知道欽此

安徽裁汰閒員摺子

奏爲遵

旨裁汰通判縣丞各缺恭摺

奏祈

聖鑒事竊臣等接准吏部咨開內閣奉

上諭國家設官分職原以保乂民生必使閭閻獲益方足收指臂之效若令冗員濫竽充數其本任既無事可辦而各員官廨一切公用不能盡出已資勢必取之民間是多設一官百姓反多受一官之累著各直省督撫悉心核議於所轄文職閒員如有可裁者酌

量裁汰據實奏聞請旨用副朕慎簡官僚勤恤民隱至意等因欽此

臣

等隨與藩臬兩司悉心酌議查安

徽省濱江阻淮幅輳遼濶撫馭巡防均關緊要原設道府直隸州丞倅州縣統轄分管各有專司其教佐各員均有本任應辦事件未便輕議裁汰惟查有徽州府通判係屬簡缺該員僅司休寧黟縣婺源祁門四縣緝捕並無監兌督運之責該府尙有同知一員事務亦簡若將該四縣捕務歸併同知兼管可期無誤又蕪湖縣縣丞一缺該縣雖地處江濱時須稽察巡查第督捕事宜現有同駐縣



城之太平府同知專司其事該縣丞本任無事可辦頗屬閒冗以上二缺應請裁汰如蒙

俞允卽將候補知州借補徽州府通判任壽世蕪湖縣縣丞林均二員撤回留於皖省遇缺卽補此等裁汰人員本係實任其未補缺以前凡遇委署別缺准其接算俸次以示公允至徽州府通判原設步快八名卽歸併該府同知衙門差遣其餘門子皂隸等役同蕪湖縣縣丞額設門子皂隸概行裁除所有編徵廉俸役食解司報撥充餉裁遣衙署估變充公除未盡事宜咨部核辦外據安徽藩臬兩

司暨該管巡道會詳請

奏前來

臣

等往返札商意見相同謹合詞恭摺具

奏伏乞

皇上聖鑒訓示謹

奏

道光十二年九月初五日奉到

硃批另有旨欽此同日奉到道光十二年八月十七日

內閣奉

上諭陶澍等奏遵旨酌裁閒員一摺安徽徽州府通判一缺並無監兌督運之責著卽裁汰其所司休寧縣

縣婺源祁門四縣緝捕事務著歸併該府同知兼管  
蕪湖縣縣丞一缺本任無事可辦實屬閒冗著卽裁  
汰所有候補知州借補徽州府通判任壽世蕪湖縣  
縣丞林均俱著撤回留於該省遇缺卽補並准其接  
算俸次餘著照所議辦理該部知道欽此

金山縣知縣典史移駐洙涇鎮其原駐洙涇之巡檢卽移駐衛城摺子

奏爲金山縣知縣典史駐劄地方偏臨海澨官民非便敬陳今昔不同情形請於適中常駐之處互換移駐並將衙署監獄捐貲辦理以資彈壓而順輿情仰祈

聖鑒事竊照江蘇松江府屬之金山縣於雍正四年由婁縣分設因縣境之東南隅濱海地方向有衛城爲水師駐防之所遂將設立之知縣典史就便在該城駐劄而縣境適中之洙涇鎮民居最爲稠密

惟以巡檢一員分駐其地嗣因民間完納錢漕衛城偏遠往來不便因於洙涇鎮就近建立漕倉每年收漕時知縣卽駐該鎮收兌旋經屢議將洙涇改爲縣治祇因未建城垣其議復寢迨乾隆五十九年間衛城遭被風潮縣署坍塌該縣辦公無所從此常駐洙涇民皆稱便惟監獄原建衛城止留典史駐守與洙涇相去六十餘里歷任督撫臣均以知縣典史分駐兩地體制不宜檄飭該縣仍回衛城與典史同駐不得常在洙涇臣等亦屢經照案飭催節據該縣及紳士等稟詳請將縣治移駐

洙涇並據前後知府等勘明衛城地濱海汊居民  
寥落駐有將備營兵居其大半城南卽係大海東  
距華亭縣界僅一里西距浙江平湖縣界僅九里  
而該縣全境田土人民俱在城之西北洙涇鎮之  
西南故洙涇實爲金山一縣適中之地該鎮烟戶  
旣繁四鄉往來無不稱便前因徵收漕米於此建  
倉繼則完納錢糧又經設庫卽

壇廟各所亦久經就地捐建今若仍飭知縣般回衛  
城不特衙署久坍又須籌建且於闔境公事均甚  
不便如因印捕不宜分駐莫若以洙涇巡檢與典

史互換駐劄則彼此皆有衙署不必另建祇須在  
洙涇添建監獄一座又知縣向駐倉署規模尙未  
全具今若卽以倉署爲縣署尙應添設科房等項  
所需一切經費各紳董情願捐貲自行經理該縣  
亦請捐廉湊辦等情臣等復飭司道詳加察看悉  
心妥議去後卽據蘇州藩司陳鑾署江蘇臬陞司  
怡良蘇松太道吳其泰會詳以事係便民應請俯  
如所稟准其移駐所有衙署監獄等項一併准其  
捐辦無須開銷經費詳請具

奏前來

臣

等覆查該縣移駐洙涇鎮之議自乾隆二

十四年卽經前任撫臣陳宏謀

題准在案其時倉庫監獄俱已設立祇因城垣未建復於三十二年蘇州布政使蘇爾德奏寢其議飭令仍回衛城但地勢實以洙涇爲便且自衛城衙署坍塌之後該縣常在洙涇辦事名爲暫駐實已久居雖經檄飭般回而民情厯久相安礙難強行復舊查各省縣治亦有無城處所卽如江蘇之清河縣地居衝要兼有河庫並未建立城垣今金山縣駐劄地方與其僻處於縣境之一隅致使輿情閼隔莫若移駐於適中之要地卽爲衆志成城至



衛城向設武職參將今已改爲遊擊守備各一員  
帶兵駐守足資防衛再將巡檢一員移令駐彼文  
武交資布置更爲周密如此一轉移間公事民情  
兩得其便並無窒礙

臣等面商無異相應恭懇

聖恩俯准將金山縣知縣移駐該縣適中之洙涇鎮并  
將典史隨同移駐其原駐洙涇之巡檢卽換駐衛  
城典史署至洙涇添建衛署監獄等項旣據該縣  
暨紳民等情願捐貲辦理並照成案請

旨免其造冊報銷

臣

等爲因地制宜起見謹合詞恭摺

具

奏伏乞

皇上聖鑒訓示謹

奏

道光十四年十一月初二日奉到

硃批該部議奏欽此

海州州判衙署移建響水口摺子

奏爲海州州判移駐響水口應行動項建設衙署以資棲址辦公恭摺

奏祈

聖鑒事竊照海州所屬之響水口地方緊要前於道光

八年經前督

臣

蔣攸銑會摺

奏請添設武弁移撥兵丁並將州判移駐該處以資彈壓接准兵部咨令將其餘一切未盡事宜分別題咨報部辦理等因當經轉行遵照茲據江寧布政使楊夔詳稱前據海州具詳移駐州判彈壓地

方甚爲收謐祇須建設衙署餘無應議事宜卽經飭據該州知州王用賓州判龔照琪會詳查得響水口有捐職李樹欣等基地一區形勢平濶堪以建立衙署飭匠確估實需工料銀兩造具冊結詳送隨經移道勘轉今准淮海道加結移送到司所有冊開估需工料銀一千九百八十四兩四錢八分三釐應請准其在於司庫存公銀內照數動給建造詳請具

奏前來臣等伏查海州州判移駐響水口地方前經奏明試行一年著有成效再行議建衙署今自移駐

以來彈壓得力地方安靜頗有成效自應建設衙署以資辦公所有估需工料銀兩既據該州等確勘由道覆核結轉合無仰懇

聖恩俯准在於司庫存公銀內照數動給飭令上緊建造工竣報候委員驗收不任稍有偷減除飭取造冊結另行詳

題並將該州判原設衙署估變繳價解司報撥詳咨外謹合詞恭摺具

奏伏乞

皇上聖鑒謹

奏

道光十五年二月初六日奉到

硃批該部議奏欽此

陶文毅公全集卷六目錄

奏疏 倉庫

清查皖省倉庫虧空並酌擬追補章程摺子

勸設豐備義倉摺子

會同蘇撫籌設江寧省城豐備義倉摺子

會同蘇皖兩撫覆奏招商販米由海運京收買不  
無流弊惟官運尙可行於豐年摺子

奏疏 倉庫

清查皖省倉庫虧空並酌擬追補章程摺子

奏爲遵

旨清查安徽省倉庫虧缺完欠各確數酌擬追補章程

恭請

聖訓事竊照道光元年正月欽奉

諭旨安徽省倉庫錢糧虧數甚多著將舊虧實在數目  
逐案詳查究其致虧之由或應執法或應著追或應  
彌補酌定限期於何時可以辦理完善不得以一奏  
塞責等因欽此當經前撫臣李鴻賓



奏請派員設局查辦在案道光二年二月又接

廷寄奉

上諭據孫爾準奏皖省六次清查除實係捐賠業經造冊咨部核辦外其各員虧缺抵缺各款尙有輻輳款目並隨時追繳應行劃收清款者必須根查底案沿流溯源得其實在致虧之由然後可以酌定追補之法以杜續虧之漸所奏甚是著陶澍再行逐細確查籌定章程核實奏明辦理欽此伏查此案臣於前年

冬間蒙

恩簡授安徽藩司

陛見時面承

訓諭輕重緩急相機妥辦跪聆之下敬謹銘心抵任後  
卽檢閱舊卷從前五次清查俱以州縣開報之數  
入冊定案其開報數內每有前後任轆轤未清之  
款並未逐一釐正而開報數外亦未查其有無欠  
解別款故多不實不盡歷久愈勢迨前撫臣孫爾  
準莅任經臣時時稟商熟籌扼要之法因思州縣  
虧缺或係正雜或係捐賠藩司衙門俱有檔案可  
稽先應檢核司案將州縣欠款截清界限俾欠款  
得實而虧數自明隨督率局員將嘉慶二十五年

以前凡州縣欠解正雜錢糧並應捐未解各款無論已入清查未入清查按地按員按年按款分晰開出以司庫之檔案核州縣之冊報虛實立見其間有州縣自行立議攤捐及前後任互相轆轤之款司案所不能詳者卽調取交代底冊議單欠據層層考核始得條分縷晰澈底查明凡原報舛錯者悉行釐正遺漏者悉行補出臣次第核定分造款冊隨時呈送前撫臣孫爾準覆核將次齊全值前撫臣調任福建臣蒙

恩擢任巡撫當將款冊移交署藩司惠顯接辦並將查

辦情形備細告知飭令再加稽核茲據該署司督  
同局員將各州縣倉庫完欠各數造冊呈送前來  
臣覆加確核查得安徽省倉庫兩項自嘉慶五年  
九年十四十六至十九年十月止厯五次清查原  
報虧抵攤捐共銀五百五十一萬四千七百四十  
三兩零穀米麥豆四萬三千四百三十石零節次  
追補截至道光元年三月前撫臣李鴻賓

奏明設局查辦之日止已完銀二百六萬五千三百  
二十九兩零又咨交外省查辦銀一百五十五萬  
五千一十三兩零穀米麥豆六百三十六石零因

其人已離皖省存沒未定應追應免聽各旗籍照  
依部議條款自行辦理其餘尙有未完銀一百八  
十九萬四千四百一兩零穀米麥豆四萬二千七  
百九十四石零內除有款可領應由司劃收銀五  
萬三千五百二十四兩零又查豁案內已奉准免  
銀二十二萬二千五百六十九兩零穀米麥豆一  
千七百石零及准部行查詳經前撫臣孫爾準查  
明覆

奏請免銀一百四萬九千五百六十二兩零穀米麥  
豆一萬五千四百九十三石零又原報列抵墊完

民欠一項并林泰增監追無完銀款應歸另案追  
賠銀二十六萬一千五百九十八兩零穀米麥豆  
一萬一百三十八石零仍未完銀三十萬七千一  
百四十八兩零穀米麥豆一萬五千四百六十三  
石零自<sub>臣</sub>等此次查辦以來復追完銀二十八萬  
七千九百五十四兩零穀米麥豆一萬五千四百  
六十三石零核實在安各員仍應追銀一萬九千  
一百九十四兩零內除周之桂呈繳房屋作抵銀  
三千三百九十一兩實應追銀一萬五千八百三  
兩零此十九年以前虧缺完欠之確數也今自十

九年十月以後至二十五年歲底止除捐賠各款  
確在二十五年八月二十七日欽奉

恩旨以前核與部議准免條款相符者業經詳明前撫

臣孫爾準具

奏請豁外現在查出從前漏報及續經虧抵各款共  
銀五十七萬六千七百七十七兩零錢一百九十  
七千零穀米麥豆二萬七千五百九十九石零內  
核實查明有款可領者一十七萬二千五十一兩  
零有物可變者一萬七千一百八十一兩零又有  
款可以徵扣歸補者一十萬三千九百四十四兩

零穀豆一千六百七石零有款可以追解歸補者  
六萬八千九兩零錢一百九十七千零穀米麥豆  
八千七百五十四石零並有因公墊用在此縣爲  
抵款在彼縣爲捐款應俟查免案內銷款劃還者  
九萬八千二百五十一兩零穀米六千四百一十  
石零共銀四十五萬九千四百三十六兩零錢一  
百九十七千零穀米麥豆一萬六千七百七十三  
石零應飭現任分別追變領解歸款追變不足著  
落分賠計實在十九年以後虧缺倉庫正雜錢糧  
共銀一十一萬七千三百四十一兩零穀米麥豆



一萬八百二十六石零并十九年以前應追舊虧  
未完銀一萬五千八百三兩零統計嘉慶二十五  
年以前虧數共銀一十三萬三千一百四十四兩  
零穀米麥豆一萬八百二十六石零此項人員卽  
執法嚴辦立予參革查抄變抵監追治罪亦屬咎  
所應得第察其致虧之由多係因公賠累以及衝  
途歉區入不敷出輾轉那墊成虧尙非侵盜入已  
合無仰懇

皇上格外

天恩俯予勒限著追請將虧數在一萬兩以上之原任

寧國縣計參知縣蘇景眉等二員五千兩以上之  
原任定遠縣候補知縣任慮衡等七員三千兩以  
上之原任六安州潁州府同知恒山等八員一千  
兩以上之原任霍邱縣降革知縣李寶中等十九  
員同一千兩以內之原署績溪縣試用通判傅懷  
江等二十六員一併定限勒追限滿無完查抄變  
抵監追治罪至現虧之員兼有舊欠者併數勒追  
不准另起追限致滋懸宕伏思追補舊欠必先杜  
絕新虧杜絕之法亦惟有嚴交代提存庫減捐款  
禁流攤數端而扼要尤以有犯必懲俾後來不致

效尤臣在藩司任內已將州縣捐款分別裁減歸提解三成養廉案內詳

奏遵行並通飭各屬將私議流攤之款永遠禁革凡遇交代不許混列存庫濫行接受如績溪縣清愷交代虧短元年錢糧一經查出立即參辦以示懲創總不使屬庫有徵存未解銀款以絕那掩之弊至安省歷次清查有議捐節省彌補津貼半廉等項名目在各前撫臣原爲籌補無著調劑苦缺起見惟安省缺多瘡苦往往補於前而虧於後劑於此而缺於彼有名無實徒資藉口現在舊虧無著

並捐賠各款已奉

恩旨查免無須州縣捐賠至實在衝途苦缺辦公賠累

之潛山鳳陽靈璧三處

臣

已核定津貼銀數詳經

前撫

臣

奏奉

諭旨遵行亦可無須再議

臣

受

恩深重斷不敢以一奏塞責惟有殫竭血誠極力整刷

務使從前之宿累全清此後之章程悉定清舊欠

卽以杜新虧庶幾錢糧無紊吏治亦可期澄敘矣

臣

與督

臣

孫玉庭往返札商意見相同謹合詞具

奏並酌擬追補章程查明各員致虧之由繕具清單

恭呈

御覽伏乞

皇上聖鑒訓示謹

奏

謹將安徽省州縣倉庫虧缺酌擬追補章程恭

呈

御覽

一虧數既已查清應立限勒追以重

帑項也皖省此次清查自嘉慶十九年起至二十五年歲底止凡各州縣那抵各款並十九年以前

歷次清查未完及漏報之款俱已詳查案據沿  
流溯源分晰款數核實登載所有新虧舊虧自  
應并計勒追不必再分先後應請將虧數在一  
千兩以內者暫免議處勒限一年全完一千以  
上至三千者降一級留任勒限二年全完開復  
三千兩以上至五千兩者降二級留任勒限三  
年全完開復五千兩以上至一萬有零者革職  
留任勒限四年全完開復逾限無完及完不足  
數革職監追查抄備抵不足數勒限一年全  
完免罪如再無完除本員照例治罪外所有欠

項仍照那移定例在於從前歷任各上司名下  
分賠歸款

一追補人員限期應量爲區別也查此次虧缺銀  
數尙不甚多追限分作四年亦稍寬展原以追  
補須有實濟限期稍寬庶得從容彌補免使剗  
肉補瘡又蹈那移積弊此內有陞任道府以上  
者亦有候補試用丁憂告病降革無缺者情形  
既有不同追限亦宜區別應請將陞任道府以  
上人員照現任限期酌緊一半候補試用丁憂  
告病降革無缺人員照現任限期酌展一半逾

限無完照現任章程一律辦理丁憂病故降革等員如有子孫出仕係現任知縣以上者亦照現任定限著追如係候補及知縣以下者均酌展一半限期追繳在皖各員以奉

旨之日起限其回籍及陞任各員以接准皖省咨會之日起限追繳銀兩卽解安歸款

一上司分賠銀兩應一體立限追繳也查州縣經手錢糧那移虧缺固咎有應得而該管上司不能認真稽查致倉庫虛懸亦咎無可辭故例載分賠所以重考核也應請將該管上司賠項查



明年月久暫一體立限賠繳數在五千元以下者限三年五千元以上者限四年一萬兩以上者限五年賠不足數奏明請

旨交部分別辦理

一交抵物件應趕緊勒變歸款也查州縣交代本不應將什物作抵乃節次清查均有房屋鋪墊衣物等項作抵此等物件果可移交何難自行售變是其高擡價值以少抵多顯而易見臣在藩司任內業已通飭禁止如此後交代一經查出隨時參辦外所有此次查出抵款應照上次

定限著落現任之員趕緊變繳一千兩以下限  
半年一千兩以上限一年三千兩以上限二年  
掃數變價歸款變不足數著落原抵之員與承  
變之員各半分賠如有意延宕全不變繳以致  
房屋坍塌什物霉爛者咎在承變之員卽著落  
獨賠其承變限內遇有交卸各照在任月日計  
算分賠勒限一年完繳逾限無完及完不足數  
照例參革抵缺銀款著落該管道府州賠補  
一書役借欠應分別追賠也各州縣書役承辦案  
件緝匪解犯一切緊要差使透支工食以爲盤

纏紙飯之用。在彼時原擬按季扣還。及至案件繁多。借欠日重。一經革故逃亡。遂成無著。前此五次清查。曾議革除此。查出仍有此項抵缺銀款。卽嚴參著賠。亦咎所應得。惟其中多有歷次清查漏未查出之款。且究係因公墊給。情非得已。如概令官賠。置原欠書役於不問。轉使奸胥猾吏得計。將來更難整飭。應仍照五次清查原辦分別勒追賠補。無論銀數多寡。概限二年。在原欠書役名下嚴比追完。逾限無完及完不足數。照例治罪。一面抄產變抵。抵不足數著落。

原借之員名下賠十分之六情追各員名下賠  
十分之四如接追限內遇有交卸各照在任月  
日按數分賠其應賠之數在五千人兩以內者限  
三年完繳五千兩以上限四年一萬兩以上限  
五年如再逾限無完原借及情追各員一併照  
例參處追不足數之欠項直隸州在於該管道  
員名下州縣在於該管府州名下著賠歸補嗣  
後地方遇有公事應由州縣自行辦理各歸各  
任不許抵交至差役墊完掣串易致侵蝕尤應  
嚴禁以除積弊

一倉項宜核實買補也查倉儲原以備緩急之用如有動缺自應隨時歸還不容延緩但從前採買係按照州縣缺穀之多寡發價買補內中派買較多之處卽遇價平之年加以轉運水腳就每石六錢之例價僅數市價之半設穀價昂貴賠貼更多州縣力不能支往往那動正雜款項補於倉而缺於庫此亦實在致虧情形臣思與其多買而不能交有名無實莫若稍寬時日分作數次買補遇豐稔之年就各屬情形核定數目發價購買年豐則穀價自平買少則挽運亦

易卽有賠貼在州縣亦易於爲力庶倉項漸以充實而庫項亦不致虧那矣

一流攤宜禁革也查各州縣流攤如墊修衙署倉廩監獄驛號橋道歲科修理考棚棹凳緝拏擒匪棍徒設卡巡防及例價不敷各項往往稟求本管府州批准分年流攤或交代之際憑監盤說合立議分攤或以抵款不敷將交項剔出數條歸入攤捐或以前攤未交又請展攤以爲延宕之計迨收接之後又視爲攤款無關緊要並不交出陳陳相因愈積愈多此等名爲攤款實

卽正項誠致虧之一大端流攤一日不止積弊一日不除臣自到任以來卽經剴切通飭應請嗣後不准再有流攤名目違者前後任一併嚴參究追如該管府州批准流攤或經監盤說合私議流攤查出一併參處

一捐款應嚴提也查捐款名目不一皆係辦公不可少之件從前各州縣捐款爲數甚鉅又有彌補節省津貼等項名目多者數千少者數百各州縣着廉幾何安得而不虧缺臣自到任以來首將此項捐款分別應裁應減核數在養廉三

成以內詳經前撫臣奏奉

諭旨遵行在案州縣去此大累如釋重負實已無可藉口惟前所定之數僅敷辦公而止本無餘剩若提解不前辦公又必掣肘且係

奏定之款未便稍任延宕計各州縣每年捐數僅在二百兩內外零星批解亦於州縣非宜是以臣

經通飭各屬於批解上忙錢糧時隨同解司備用如有未清卽於耗羨內劃扣庶得年清年款公私兩益至酌提羨餘一項溯從二次清查彌補無著每年各州縣提銀十五萬兩皖省虧空



之愈積愈多實起於此上年經臣遞減爲一萬  
兩詳請

奏明辦理專以津貼衝途最苦之潛山鳳陽靈璧三  
縣亦係斷不可少之數應按四季提解以免拖  
欠

一嚴存庫款目以重交代也查嘉慶二十五年以  
前各州縣欠解一切正雜捐款現俱報入清查  
已可按冊而稽至道光元年以後各清各款無  
許絲粟虧欠第恐考核不嚴仍蹈虧那故轍查  
從前州縣交代冊內每將前任短交之款列作

存庫造報彼此商同將無作有積欠愈多遂成  
虧缺是前任之得以支飾後任之敢於通融皆  
存庫二字爲取巧藏拙之方也臣前在藩司任  
內卽通飭各屬凡前後任交代務將現存銀兩  
悉數批解冊內不准開列存庫故如績溪縣虧  
缺元年錢糧立卽顯露業經照例參

奏但必須明定章程以垂久遠應請嗣後州縣交代  
冊內不准開列存庫如已報入清查者或虧或  
抵均於冊內逐一載明倘有應領銀款作抵交  
項者亦於冊內明晰登注俾得核實稽考卽時

查辦至於紙張飯食一切無關正雜額捐之款  
不得列入交代冊內以免紊雜

一交代案內議單欠票應嚴行禁革也查州縣交  
代如果款目清楚何須議立單據倉庫無虧更  
無所用其欠票此等名目原係州縣通融交接  
之弊此次清查前撫臣李鴻賓因各州縣開報

款冊易致朦混或將本任虧缺捏報前任是以  
奏請調查議單欠票原以鉤稽舊虧之是否確實並  
非交代案內應有此名目也今清查告竣自宜  
明定章程俾知遵守應請嗣後州縣交代責成

接任之員據實盤收倘再私立議單欠票徇情  
接受一經發覺卽將前後任嚴參治罪該管道  
府州及監盤各官一併查參懲辦庶通融之弊  
旣除而續虧自可杜絕矣

道光三年四月十四日奉到

硃批另有旨欽此又章程十條奉

硃批所議十條均係核實辦理亦屬周詳另有諭旨欽  
此同日承准

軍機大臣字寄道光三年三月三十日奉

上諭陶澍奏清查安徽省倉庫虧缺完欠確數酌議追

補章程一摺安徽省倉庫虧缺款目繁多據該撫查明嘉慶十九年以前除節次追補及豁免外實應追銀一萬五千八百三兩零十九年以後至二十五年止有從前漏報及續經虧抵各款共銀五十七萬六千七百七十七兩零錢一百九十七千零穀米麥豆二萬七千五百九十九石零所議追補章程十條朕詳加披閱均係核實辦理亦屬周詳著照所請虧數在一萬兩以上之蘇景眉等二員五千兩以上之任慮衡等七員三千兩以上之恒山等八員一千兩以上之李寶中等十九員同一千兩以內之傅懷江等

二十六員均按限著追現虧各員兼有舊欠者併數勒追不准另起追限致滋懸宕其各屬私議流攤之款永遠禁革如遇交代有混列存庫濫行接受者查出立即參辦以杜新虧該撫此次奏定章程務即認真核辦實力整刷毋得稍有瞻徇仍致有名無實也將此諭令知之欽此

勸設豐備義倉摺子

奏爲敬陳勸設豐備義倉章程請

旨永遠遵行以防荒歉而厚民生仰祈

聖鑒事

臣

惟民以食爲本事須豫則立前年皖江被水

哀鴻遍野仰蒙

恩旨賑撫兼施並經

臣

勸諭有力之家捐輸助賑流離

數十萬獲就安全事後猶深憫惻因思博施濟衆

自古綦難徹土綢繆宜先陰雨常平之制善矣然

待惠者無窮至社倉春借秋還初意未始不美而

厯久弊生官民俱累變而通之惟有於州縣中每

鄉每村各設一倉秋收後聽民間量力捐輸積存  
倉內遇歲歉則以本境所積之穀卽散給本境之  
人一切出納聽民間自擇殷實老成管理不經官  
吏之手以冀圖匱於豐簡便易行自上年酌議章  
程通飭各屬出示勸行已據青陽銅陵望江太平  
懷遠婺源等處捐有成數各屬亦皆踴躍擬俟今  
年秋熟後一律辦理臣於正月入  
覲曾經縷達

天聽茲臣蒙

恩調任江蘇念此垂成之緒必須奏奉



諭旨庶可久遠遵行謹將所議章程十二條敬爲我  
皇上陳之

一鄉村無論百餘家十數家總以里居聯絡者公  
設一倉每年秋收後各量力之盈絀捐穀存倉  
出者毋吝勸者毋勒或數十石或十數石多則  
一二百石少卽數石數斗數升均無不可收穀  
時公同立簿登記擇一老成殷實人總管再擇  
一二人逐年遞管仍設立四柱交冊分別舊管  
新收開除實在明晰登載互相稽查連年豐稔  
日積日多則穀不可勝食矣

一 鄉村零戶有難於聯絡者或每族各爲一倉或一族中每房各爲一倉或以散戶歸入附近鄰保共爲一倉均聽民便總在隨地制宜多多益善果能一處行之有效久而他處自仿照行之矣

一 穀倉宜擇善地不宜近水不宜近市以防不虞建議之初倉廩未立或神廟或公祠或老成殷實之家倉屋有餘者均可借儲但須本人情願不得強借一俟穀石稍充即可另自置倉

一 倉穀由於樂捐間或有溼有糲不能拘泥畫一

應於收倉時先爲曬乾車淨公同登記耗蝕若干或收貯年久又須公同出曬一次復量上倉再逐一登記實數以便查考

一設倉本係義舉司事之人不容稍有侵蝕亦不許藉端開銷惟看守倉廩之人係屬雇覓常川在倉不能不給予工食責令巡查遇有風摧雨漏倉板損破之處立即告知經管之人及時修理其鎖鑰等項不得交守倉人佩帶

一捐穀既有成數卽赴地方官呈明立案以免匪徒阻撓擾亂章程以後捐多捐少收放出入官

吏概不與聞卽里長甲長亦無許越俎倘有吏役託名稽查藉端需索查出照詐贓例從重懲治

一積穀旣饒止須添建倉廩不必推陳出新以求滋長亦不必春借秋還以權利息戢爭杜紛此爲最要惟餘穀置田收租尙可並行不悖然必積穀實在充裕有餘以少半置田乃可否則不必蓋此穀原爲備荒而設至捷至便推陳出入易滋朦混借出難歸漸歸烏有置買產業雖屬經久之計然不能救濟目前亦非急務也

一每遇災荒總管分管外添擇公正司事計穀之多寡先儘本村中鰥寡孤獨無告之人次及極貧又次及次貧或五日一散或十日一散事竣憑衆確算至家計稍可支持者不必分給卽小歉之年亦不必動用以歸實濟

一捐穀之家此穀旣捐卽係公物遇有災歉不得以從前甲多乙少致啟爭端或先在此村捐穀之家其後移居他處遇此村散放不得以曾經捐穀回向轉索新來之戶從前雖未捐穀遇有散放亦應酌給些須不得獨任向隅蓋各保各

境以鄉村爲斷雖救卹無分彼此而穀少人多亦不得不稍爲限制其各族各房積穀者則不必以鄉村爲斷

一年豐時和勸捐較易果能積有二年五年之蓄又不妨畧爲變通邀同矜者劃分若干於鄉間添設卹養育嬰等會或於冬間就村莊中鰥寡孤獨與外來無告窮民量爲賑濟亦所以廣任卹也

一鄉村紳士克知大義者多自必首捐爲倡如有能捐穀千石者或捐銀千兩以上買穀歸倉者

或捐置基產倉廩及斗斛諸器物用銀千兩以上者均當照例請

旌以資鼓勵倘慮書吏索費卽逕赴院司衙門呈明捐數以便行查確實立予請

旌斷不令善舉稍有阻格

一勸捐之外尙有因事樂施一節如民間演戲酬神及嫁娶喜期慶祝生日儘可將糜費折穀捐入義倉擴而充之不特安貧卽以保富將型仁講讓之風亦由此而興起矣

以上各條積少成多衆擎易舉所以圖便民也各

保各境人心易齊耳目亦周所以免牽掣也擇  
人經管立冊交代所以防侵蝕也紳民自理不  
經官員吏役之手所以杜騷擾也不減糶不出  
易不借貸專意存貯以備歉時所以斷轆轤而  
弭爭端也凶年不妨盡用樂歲仍可捐輸以一  
鄉濟一鄉之衆而不患其不均以數歲救一歲  
之荒而不虞其不給可小可大無窮匱也取錙  
銖於狼戾之時求水火於至足之地捐穀者不  
以爲難司事者不以爲累行所無事不求其利  
而弊自除預防其弊而利乃久也

臣爲此章程



籌思經歲簡便直捷似可爲備荒之一助如果  
各州縣能實心實力勸導有成是亦不費之惠  
也再臣所議章程與社倉之法有異本以豐歲  
之有餘備荒年之不足可否卽以豐備二字仰  
懇

天恩

賜爲倉名俾垂永久所有勸設義倉緣由謹繕摺具

奏伏乞

皇上聖鑒謹

奏

道光五年七月初十日奉到

硃批另有旨欽此同日奉到道光五年六月二十三日

內閣奉

上諭陶澍奏勸設義倉章程一摺國家養民之道足食爲先而裕民之原積貯尤重前年安徽偶遇荒歉賑撫兼施該撫請設立義倉爲未雨綢繆之計所議章程如州縣中每鄉村公設一倉秋後聽民捐輸歲歉酌量散給出納悉由民間經手不假官吏防侵蝕以禁騷擾矜貧寡而杜爭端各條著卽移交新任巡撫照議妥爲經理仍督飭各州縣實心實力勸導有成

總期經久無弊不必另立倉名欽此

會同蘇撫籌設江寧省城豐備義倉摺子

奏爲江寧省城籌設豐備義倉城鄉捐輸稻穀以防  
荒歉而廣

皇仁仰祈

聖鑒事竊照大江南北頻年被水成災仰賴

鴻慈不惜數十萬帑金撫賑兼施

恩宏大造其有例賑所不能徧者各地方紳耆富戶感  
荷

生成義激於色莫不同心救助捐貲解囊或按戶散錢  
或設廠煮粥凡此乏食窮黎實已普被

皇仁同登衽席惟思年歲之豐歉無常而陰雨之綢繆  
宜豫與其臨時捐湊博濟尤難曷若先事圖維蓋  
藏有備臣陶澍前在安徽巡撫任內勸設豐備義  
倉籌畫積貯臣林則徐於蘇州城內仿照而行並  
經恭摺會

奏在案江寧爲省會重地尤宜先事籌備臣陶澍前  
因緝私賞項存有餘銀五千兩剗發江寧府轉發  
上元江寧兩縣以爲倡建義倉備穀之用旋據藩  
司楊夔轉據前署上元縣知縣高郵州知州馮思  
澄署江寧縣知縣李金芝詳稱遵經率同上元縣

訓導楊會昌並在城紳士李恩元沈琮程鍾慶王鼎輔孫廷松萬甫廷汪度等在於城鄉廣爲勸捐並據該紳士等呈稱前次發交銀兩因新建義倉所費甚鉅覓得民間舊有貯米礮坊坐落漢西門大街計房屋倉廩共二十九間可貯稻二萬石呈報府縣勘明議價銀二千一百兩立契承買以作義倉餘銀二千九百兩除修葺並添置器具之用其餘儘數購得稻穀三千一十石存貯在倉又城郭紳富捐輸穀九千五百餘石已收貯四千餘石餘俱陸續運倉又各鄉捐輸穀二萬三千八百餘

石仍各存本村選擇殷實之家收貯以爲本村歉歲所需總計城鄉共已認捐稻穀三萬六千三百餘石其城郭紳富捐數內有每石折交銀一兩者俟積有成數卽於糧賤之時代買入倉其平日看守倉廩及曬晾人工一切費用另行募捐辦理不動捐穀正項各等情具詳前來

臣

陶澍前自清江

回省順道親詣倉內勘驗地基尙高廩舍亦甚堅固所貯稻穀查照道光五年

奏定豐備倉章程辦理遇有歉年方准動用舉凡減糶出易春借秋還易滋流弊之處概不准行惟稻

穀長貯在倉每年必須曬晾方可無虞霉變其曬  
晾必有折耗每次每石定以三升爲率准其註冊  
以備稽查庶經手者亦無虞賠累章程釐定弊竇  
毫無此次承辦各紳士數月以來實心任事業已  
收有成效卽各紳富捐輸踴躍尤爲嚮義急公克  
敦任卹均屬可嘉除飭查明尤爲出力之人並捐  
數在三百石以上者俟查冊到日照例分別奏咨  
另請

恩施外所有籌備義倉現貯稻穀實數以備荒歉緣由  
理合恭摺具



奏伏乞

皇上聖鑒再此次建倉備貯係官民捐輸歸民間承辦並不經官吏之手應免其造冊報銷合併陳明謹奏

道光十五年十一月二十三日奉到

硃批另有旨欽此同日奉到道光十五年十一月十九日內閣奉

上諭陶澍等奏籌設義倉以防荒歉一摺江南省連年被水撫賑兼施茲據該督等奏於江寧省會地方籌設豐備義倉積貯穀石以防荒歉共計捐穀三萬六

千三百餘石業已收有成效此項建倉備貯係官民捐輸承辦著免其造冊報銷該部知道欽此

會同蘇皖兩撫覆奏招商販米由海運京收買不  
無流弊惟官運尙可行於豐年摺子

奏爲准咨查明會議覆奏仰祈

聖鑒事竊

臣

等於本年二月接准戶部咨軍機大臣會

同戶部議奏御史胡長庚預籌積貯一摺請

旨飭交

臣

等查明江南米價是否平減如由海販運是

否可無流弊如到天津後約計若干價值可以收

買其川米一項是否能招諭商民販運北來俱令

詳悉議奏等因前來

臣

等當卽分飭江寧江蘇安

徽各藩司並蘇松太道會同詳查妥議去後茲據

該司道等詳稱各就地方情形悉心體察江蘇所屬四府一州漕糧甲於他省江寧所屬漕糧亦屬不少誠如部臣會奏所稱卽遇年歲豐收除辦漕外僅敷本處民食查上年江蘇全省秋禾均屬中稔登場之際糧價雖平尙須紋銀二兩以外現當漕糧開兌之後已漸加增向來本藉川廣商販運米接濟近因價值相仿商販甚稀移查蘇淮各關米船經過俱少於往年京口一帶亦無米船聚集若皖省地濱江淮產米原屬無多上年秋收亦有歉薄之處現據各州縣所報米價自一兩一二錢

至三兩七錢不等雖升斗有大小不同亦尙未爲  
平減若再令販運北上誠恐市價增昂有妨民食  
此現在米價高下不同之情形也至招商販買由  
海輸運自較之從前採買糧船搭解費省期捷惟  
銀米往返宜防偷漏出洋查道光六年試行海運  
原係額漕既有定數復派委員弁沿途管押會哨  
護送號令森嚴故弊無從作今若招商自運米石  
旣無定數難保無以多報少影射偷漏卽官給印  
票南北查對而或詭稱砂礁淺阻鬆倉拋棄或將  
印票藏匿捏報遇風漂失皆無從查考其回棹之

時或託販貨物將所得收買紋銀私行出洋亦未  
可定蓋招商販運先係自出已費若嚴加查察則  
將畏縮不前若寬於盤查又恐滋生弊竇此由海  
販運之難免流弊也臣等復核該司道所查現有  
米價各處高低不同並未一律平減所議招商由  
海販運恐有偷漏銀米等弊均屬實在情形至米  
到天津約計若干價值可以收買一節此須辦理  
販運之時按照米價低昂方能核計多寡今販運  
既不可行即可不必議及其川米一項既據移查  
各關商販米船稀少其情願販運北上與否亦無

從查詢招諭惟據署江蘇藩司李象鵬蘇松太道周祖植另會詳稱商運固多不便而籌備

天庾積貯總宜設法辦理除距上海較遠地方不議外擬請嗣後遇大熟之年於秋成穀賤時撥發銀兩派委妥員於蘇松常鎮太近海州縣按照時價收買米石雇用上海沙船裝載前赴天津交卸運倉一如道光六年海運額漕辦法此項運京米石及發給米本或卽在本省災緩截留漕米案內查核融辦如此則京倉米多而運去之米又非每年新賦實於積貯有裨且米由官運不經商販可期有

利無弊<sub>臣</sub>等覆加商酌商運之難以稽查自不若  
官運之猶有把握該司道所議事屬可行惟現在  
米價已較去冬漸昂且業交夏令已趕辦不及若  
今秋各省收成再稔川楚來販又復聚集糧價一  
例平減卽由<sub>臣</sub>等察看情形酌量採買委員由海  
運解其米本等項或卽於江蘇省災緩截留漕米  
案內查核融辦亦屬變通盡利俱俟臨時再行籌  
議奏明請

旨辦理所有本年未便採買並商運不無流弊惟官運  
尙可行於豐年緣由謹會同恭摺覆



奏伏乞

皇上聖鑒訓示謹

奏

道光十八年五月二十四日奉到

硃批軍機大臣會同戶部議奏欽此